

Morning Regional Dogri News Bulletin, 20th April 2025

मार्निंग डोगरी न्यूज़ बुलेटिन, समे. 09-20 Hrs

<><><><><><>

Headlines

1. लेफ्टिनेंट गवर्नर मनोज सिन्हा होरें आखेआ ऐ जे जम्मू खित्ता, अगले 6एं म्हीनें अंदर पूरी चाल्ली रमानदारी ब्हाल करने दी बत्तै पर अगड़ा बधै करदा ऐ। एलजी होरें जोर देइयै आखेआ ऐ जे सूफी-पंथ दि'आं शिक्षां, हिंसा ते फर्कोफर्की गी नकारदि'आं न।
2. मुख्यमंत्री ओमर अब्दुल्ला होरें प्रदेश दे बेहतर भविक्ख लेई केन्द्र ते जम्मू-कश्मीर सरकार दे सांझे जतनें दी जरूरतै पर जोर पाया ऐ। मुख्यमंत्री होरें केन्द्री मंत्री डाक्टर जीतेन्द्र सिंह हुं'दे कन्नै कटुआ च इक बहु-मंजिला पार्किंग दा सांझे तौर पर उद्घाटन कीता।
3. इस ब'रे दी श्री अमरनाथ जी दी जात्तरा दरान सेवां उपलब्ध करोआने आहलें दा पंजीकरण जम्मू च शुरु।
4. रियासी च शमानी बिजली पौने करी द'उं लोकें ते तकरीबन 40 भिड्डे-बकरिएं दी मौत। रजौरी-पुंछ जिलें च अंधी-झक्खड़ ते ऐन-गड़ा पौने करी सैंकड़ा-बद्धी इमारतें ते खड़ी फसलें गी नुक्सान पुज्जा ऐ।
5. जम्मू-श्रीनगर राष्ट्री जरनैली सिड्क एनएच-44 पर केई थाहरें पर ल्हास-पस्सियां ते कुप्पड़ पौने करी, गडिडएं दी आओजाई दौने बक्खी दा बंद होई गेदी ऐ।

<><><><><><>

LG Sinha Peace

लेफ्टिनेंट गवर्नर मनोज सिन्हा होरें जोर देइयै आखेआ ऐ जे उं'दे प्रशासन आसेआ कीते जा'रदे जतनें दी बदौलत अगले 6एं म्हीनें दे अंदर-अंदर जम्मू खित्ते च रमानदारी पूरी चाल्ली ब्हाल होई जाह्ग। कारोबारी लीडरें दे अंतर्राष्ट्री नेटवर्क – वाई.पी.ओ. ग्लोबल वन दे सदस्यें गी संबोधित करदे होई एलजी सिन्हा होरें आखेआ ऐ जे उं'दा प्रशासन, स्थाई रमानदारी स्थापित करने बक्खी पूरी चाल्ली केन्द्रित ऐ। उं'नें आखेआ जे जम्मू-कश्मीर पुलस ते होर दुए सुरक्षाबल, आतंकवाद ते एह्दे तंत्र दा समूलचा नास करने लेई अनथक जतन करै करदे न तांजे खित्ते च शांति ते समग्र विकास जकीनी बनाया जाई सकै। इस मौके उप्पर एलजी होरें प्रधानमंत्री नरेन्द्र मोदी हुं'दे नेतृत्व तैहत केन्द्र शासित प्रदेश च आई दिएं सकारात्मक तब्दीलिएं उप्पर बी लोऽ पाई।

<><><><><><>

LG Sufism (byte)

लेफ्टिनेंट गवर्नर मनोज सिन्हा होरें आखेआ ऐ जे सूफी-पंथ, समाज च रमानदारी, हिरख ते एकता बक्खी जाने आहली इक मजबूत बत्तै गी दर्शादा ऐ। एह गल्ल एलजी होरें कल श्रीनगर च इक सूफी सम्मेलन गी संबोधित करदे होई आखी। उ'नें गलाया जे सूफी-पंथ, छड़ा इक आध्यात्मिक अभ्यास गै नेई ऐ सगुआं एह जीन जीने दा इक ऐसा तरीका ऐ जेहड़ा दया भावना, सादगी ते आपसी सम्बोध गी बढ़ावा दि'दा ऐ। हिंसा ते अत्तवाद दा मुकाबला करने च सूफी-पंथ दी भूमिका उप्पर लोऽ पांदे होई एलजी होरें आखेआ जे शायरी, संगीत ते आध्यात्म दे राहें दित्ती गेदी सूफी पंथ दि'आं शिक्षां, समाज च बंडूड गी खत्म करदे होई इक जागरूक ते समग्र समाज दे निर्माण आहले जतनें गी बल देई सकदि'आं न। इस मौके उप्पर बोलदे होई एलजी सिन्हा होरें आखेआ

..... बाईट

<><><><><><>

LG Ramkatha

पूज्य मोरारी बापू हु'दे आसेआ श्रीनगर च कीते जाने आहली रामकथा दे उद्घाटन समारोह च उपराज्यपाल मनोज सिन्हा होर शामिल होए। उ'नें गलाया जे रामकथा, भगवान राम हु'दी धार्मिकता, दया ते न्याऽ दा सारी दुनिया गी स्नेहा दि'दी ऐ। श्री राम हु'दिएं शिक्षाएं दे प्रचार-प्रसार ताई मोरारी बापू हु'दे समर्पण गी उजागर करदे होई उ'नें सच ते हिरख-प्रेम दे मुल्लें रायें समाज गी इक-जुट करने च इस आयोजन दी तरीफ बी कीती। एलजी होरें दहाकें परैन्त घाटी च पैहली बारी रामकथा दा सरिस्ता करोआने लेई एहदे आयोजकें गी बधाई दित्ती। 9वें दिनें तगर चलने आहले इस धार्मिक कार्यक्रम आस्तै डल झील पर बड़ी बद्ध गिनतरी च श्रद्धालु किट्ठे होए। इस मौके बोलदे होई एलजी होरें आखेआ बाईट

<><><><><><>श

CM MoS Kathua(bytes)

मुख्यमंत्री ओमर अब्दुल्ला होरें इस गल्लै पर जोर पाया ऐ जे जम्मू-कश्मीर दी तरक्की जम्मू-कश्मीर सरकार ते केन्द्र सरकार बश्कार निगगर आपसी सैहयोग पर निर्भर करदी ऐ। कठुआ च केन्द्री राज्यमंत्री डाक्टर जीतेन्द्र सिंह हु'दे कन्नै मती मंजलें आहले पार्किंग परिसर दा सांझे तौर पर उद्घाटन करदे होई उ'नें लोकें दी भलाई-बेहतरी ताई मुख् प्राथमिकताएं पर लोऽ पाई। इस मौके पर उ'नें विश्व सतह दे बुनियादी ढांचे दे निर्माण आस्तै केन्द्र कन्नै आपसी भरोसे दा जकीन दोआया जेहदे'नै भविक्ख च आईपीएल मैचें गी जम्मू कश्मीर च करोआया जाई सकोग। अपने संबोधन च उ'नें आखेआ बाईट

तोआई केन्द्री मंत्री डाक्टर डाक्टर जीतेन्द्र सिंह होरें आखेआ जे पार्किंग दी इस स्हूलत कन्नै शैहरै च गड्डिङ्गं दी भीड़ च कमी औने दी मेद ऐ। उ'नें आम लोकें ताई शैहरी बुनियादी ढांचे च सुधार आस्तै सरकार दी वचनबद्धता दी बी तसदीक कीती। उ'नें आखेआ बाईट

<><><><><><>

Service Provider Amarnath

इस ब'रे दी श्री अमरनाथ जी दी जात्तरा दरान शिव भक्तें ताई सेवां स्हूलतां उपलब्ध करोआने आह्लें लेई श्रम विभाग नै पंजीकरण दी प्रक्रिया रम्भ करी दित्ती ऐ। प्रक्रिया गी सखल्ला बनाने आस्तै सहायक श्रम आयुक्त, श्रम सराय डोगरा हाल जम्मू दे दफ्तरै च इक्क हेल्पडेस्क ते पंजीकरण काउंटर रम्भ कीता गेआ ऐ। असिस्टेंट श्रम कमिशनर रूपाली जसरोटिया होरें सब्भै पालकी आह्लें, पिट्टुएं, टट्टु आह्लें ते फेरी आह्लें अग्गे अपील कीती ऐ जे ओह तौलें शा तौले एह प्रक्रिया मुफ्त ते पन्छान पड़ताल लेई लाज्मी ऐ। बेरामी थमां बचने ते सालाना जात्तरा गी अमन रमानदारी ते बवस्थित ढंगै सिर जकीनी बनाने लेई समें पर पंजीकरण लेई जोर पाया गेआ ऐ।

<><><><><><>श

ADC Yatra

औंदी श्री अमरनाथ जी जात्तरा दे मददेनजर जम्मू दे अतिरिक्त डिप्टी कमिशनर राकेश कुमार होरें जम्मू-अखनूर सिड़कै पर चौथे तवी पुलै थमां लेइयै कनाल हैड तोहड़ी जारी निर्माण कम्में दा व्यापक निरीक्षण कीता। एडीसी राकेश कुमार होर श्री अमरनाथ जी दी जात्तरा लेई नोडल अफसर बी हैन। उ'नें राश्ट्री जरनैली सिड़कें ते ढांचागत विकास कारपोरेशन लिमिटेड दे अधिकारिणं गी निर्देश दित्ता जे ओह कम्मै दी रफ्तार च तेजी आहनन तांजे जात्तरा दे दिनें दरान गड्डिङ्गं दी बवस्थित ढंगै सिर आओजाई जकीनी बनाई जाई सकै। एडीसी होरें श्री अमरनाथ जी दे श्रद्धालुएं लेई जात्तरा निर्विघ्न बनाने गितै आपू'चै तालमेल बनाइयै जतन कीते जाने दी जरूरतै पर बी जोर दित्ता।

<><><><><><>

Rajouri Camp(byte)

आम लोकें तगर पुज्ज बनाने दे इक सराहनीय जतन च राजौरी जिला प्रशासन नै जिले दे उच्चे इलाकें दे द्रज ग्रां च माल-मवेशिणं ते उ'दे मालकें आस्तै मेडिकल कैप दा आयोजन कीता। खानाबदोश आबादी ते उ'दे माल-मवेशियें गी मुफ्त दोआइयां बंड़िडयां गेइयां। एह खानाबदोश मौसमी पलायन करदे न, स्यालें च मैदानी इलाकें च जंदे न ते सोहे च हरियाली चारागाहें दी तपाश च फ्हाड़ियें च परतोई ज'दे न। मुख्य पशुपालन

अधिकारी होरें आखेआ जे इस कैप दा मकसद उं'दी सेहत ते रोजी-रूट्टी दियें जरूरतें दा समर्थना करना ऐ। साढ़े रजौरी जिले दे संवाददाता नै होर जानकारी दिं'दे होई दस्सेआ

<><><><><><>

Lightening Struck

रियासी जिले दे डनसाल ग्रां च शमानी बिजली पौने करियै दऊं खानाबदोशें दी मौत होई गई ते उंदियां तकरीबन 40 भिड़ड बकरियां बी मरी गेइयां। जान मोआने आले मोहम्मद राशिद ते शाहबाज बेगम घरोट ग्रां दे हे, जिंदे पर मूफान दरान बिजली पौने करियै मौत होई गई ऐ जिल्ले के इक होर दूआ मकामी बसनीक गुलजार घायल होई गेआ ते फिलहाल ओह्दा इलाज चला'रदा ऐ। तोआई रजौरी ते पुंछ जिलें च अंधी-झक्खड़ ते ऐन-गड़ा पौने करी 100 शा बद्ध घरें, स्कूली इमारतें, फलें दे दरख्तें ते फसलें गी नुक्सान पुज्जा ऐ। एह्दे कन्नै बिजली दी सप्लाई पर बी माड़ा असर पेदा ऐ। प्रभावत लोकें सरकार अग्वे अपील कीती ऐ जे उ'नेंगी राहत ते मुआवजा दित्ता जा।

<><><><><><>

Highway Closed

जम्मू-श्रीनगर राष्ट्री जरनैली सिड़क एनएच-44 पर केई थाहरें पर ल्हास-पस्सियां ते कुप्पड़ पौने करी, गड़िडएं दी आओजाई दौने बक्खी दा बंद होई गेदी ऐ। प्रशासन नै जात्तरिएं लेई सलाह जारी करदे होई आखेआ ऐ जे ओह् एनएच-44 पर उसलै तोहड़ी जात्तरा गी टाली देन जिसलै तोहड़ी मौसम च सुधार नेई होई जं'दा ते सिड़कै गी परतियै सुरक्षित ढंग्गै सिर आओजाई लेई ब्हाल नेई करी दित्ता जं'दा। जात्तरिएं गी एह् गुजारिश बी कीती गई ऐ जे ओह् जम्मू-कश्मीर ट्रैफिक पुलसा दे अधिकारिक सोशल मीडिया हैंडलें कन्नै जुड़े दे रौहन तांजे उ'नेंगी सिड़क दी स्थिति बारै ताजा जानकारीयां कन्नो-कन्नी गै थ्होदि'आं रौहन।

<><><><><><>